

POPERA GA TITUCAX

NAXÜMATÜXÜ GA PAURU

Tituxü narümoxe ga Pauru

1 ¹⁻²Pa Titux, choma i Pauru i Tupanaärü puracütanüxü nixi i cuxcax chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duñxügü i Tupana idexechixümaã nüxü chixuxüçax i norü ore na Tupanaãxü yaxögüãxüçax rü nüxü nacuxgüxüçax i ngëma norü ore i aixcüma ixixü i tüxü rüngüxëëxü na naxcax imaxëxüçax. Rü ngëmaäcü Tupanaãxü tayaxögü rü naxcax tamaxëchaü erü tanayauxgüchaü i ngëma maxü i taguma gúxü. Rü ngëma maxü i taguma gúxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³Rü ñuxma rü marü nawa nangu na Tupana tüxü nüxü cuxëëxü i ngëma norü ore i mexü i tüxü maxëëëxü. Rü ngëmacax nümatama ya Tupana ya tórü maxëëëruü choxü namu na nüxü chixuxüçax i ngëma norü ore. ⁴Pa Titux, cuma rü Tupanaärü orewa rü chaune quixi yerü chauxütawa cunayaxu ga Tupanaärü ore ga noxri rü

ñuxma rü chauxrüü cuyaxõ. Rü chanaxwaxe i Tanatü ya Tupana rü Ngechuchu ya Cristu ya tórü maxëëëruü na cuxü rüngüxëëgüxü rü cuxü nataãëxëëgüxü.

Tituarü puracü ga Cretawa

⁵Rü yexguma Cretaarü capaxügu cuxü chamuxgux, rü cumaã nüxü chixu na yema yaxögüxütanüwa cuyanguxëëxüçax ga yema puracü ga tama chaguxëëxü ga yexguma cuxna yéma chataegugu. Rü yemacax cumaã nüxü chixu na wüxichigü ya iãnewa nüxü quixunetachigüxüçax i tupaucaarü äëxgacügü na yema yaxögüxümaã inacuxgüxüçax, yema cuxna na chaxägaxürüü. ⁶Rü wüxi i äëxgacü i yaxögüxüärü, rü nanaxwaxe i meã namaxü na taxüema chixri nachiga idexagüxüçax. Rü nanaxwaxe i wüxitama tixi ya namax. Rü nanaxwaxe i naxäcügü rü yaxögüxü na yixigüxü rü meã na namaxëxü na taxüema nüxü ixuxüçax na chixri namaxëxü rü exna chixri nanatüga naxinüëxü. ⁷Erü yíxema yaxögüxüärü äëxgacü ixixë, rü Tupanaärü puracü nixi i taxüxü. Rü ngëmacax tanaxwaxe i

aixcūma meā tamaxũ. Rũ tama name i wũxi i yatũ i chixecūmaxũ tixĩ rũ chixexũgu rũxĩnũxũ tixĩ. Rũ tama name na tangaxũxũ, rũ nuçax tadauxũ, rũ togũ i duũxũgũxũ tawomũxẽxũ i norũ ãiẽrucax.

⁸Natĩrũ tanaxwaxe i guxũguma meā duũxũgũxũ tayaxu i tũmapatawa, rũ aixcūma nũxũ tangechaũ i ngẽma duũxũgũ i meā maxẽxũ. Rũ tanaxwaxe i wũxi i yatũ i aixcūma tũmaãẽxũ cuáxe tixĩ, rũ guxũguma duũxũgũmaã mecũmaxẽ tixĩ, rũ aixcūma Tupanacax maxũxẽ tixĩ, rũ guxũguma meā tũgũmaã icuáxe tixĩ. ⁹Rũ yĩxema yaxõgũxũãrũ ãẽxgacũ ixĩxẽ rũ tanaxwaxe i meãma nagu tixũ i ngẽma ore i aixcūma ixĩxũ ga tũxũ inguxẽẽxũ, na tũma rũ ta togũxũ tangũxẽẽxũcax i ngẽma ore i mexũ, na ngẽmaãcũ nũxũ tanangũchaũẽẽxũcax rũ nũxũ tayaxõgũxẽẽxũcax i ngẽma duũxũgũ i noxri tama yaxõgũchaũxũ. ¹⁰Erũ nangẽxma i muxũma i yaxõgũchirẽxũ i tama aixcūma irũxinũẽchaũxũ. Rũ ngẽma guxũãrũ yexera tama irũxinũẽchaũxũ nixĩ i ngẽma Yudũgu i yaxõgũchirẽxũ i naxwaxegũxũ na nuxcũmaũgũxũ i nacũmawe naxĩxũ i ngẽma yaxõgũxũ. Rũ nũmagũ rũ ore i taxuwama mexũxũ nixugũgũ, rũ ngẽmaãcũ duũxũgũxũ nawomũxẽẽgũ. ¹¹Natĩrũ ngẽma duũxũgũ i ngẽmaãcũ chixri ngxẽẽtaegũxũ, rũ chanaxwaxe i noxtacũma

icuyanangeaxgũxẽẽ. Erũ muxũma i duũxũgũxũ nachixexẽẽgũ rũ ñuxmata ñuxre ya ipatawachigũ rũ nanachixexẽẽ i guxũma i duũxũgũ na tama aixcūma Tupanaãxũ yaxõgũãxũcax. Rũ ngẽma ore i taxuwama mexũmaã duũxũgũxũ nangũxẽẽ na ngẽmaãcũ nawomũxẽẽgũãcũma ngĩxũ

nayauxgũxũcax i norũ ãiẽru. ¹²Rũ wũxi ga yematama capaxũcũãx ga norũ tupanaãrũ orearũ urũ nixĩ ga natanũxũxũtama ixuxũ rũ ñaxũ:

“Rũ ñaã Cretacũãx i duũxũgũ rũ guxũguma dorataaxgũxũ nixĩgũ, rũ ñoma naẽxũgũrũ nĩdũrae, rũ nitaanũ, rũ nixoxochi”, ñaxũ. ¹³⁻¹⁴Rũ aixcūma nixĩ ga yema ore ga nũxũ yaxuxũ ga yema yatũ. Rũ ngẽmacax chanaxwaxe i porããcũ cuyaxucuxẽgũ i ngẽma yaxõgũxũ na aixcūma meā yaxõgũãxũcax, rũ tama nagu naxĩxũcax i ngẽma Yudũgũcũma. Rũ chanaxwaxe i namaã nũxũ quixu na tama naga naxĩnũẽxũcax ega ñacũ namuãxgu i ngẽma duũxũgũ i tama nũxũ cuaxgũchaũxũ i ore i aixcūma ixĩxũ. ¹⁵Rũ yĩxema aixcūma Tupanapexewa mexẽ rũ guxũwama tame. Natĩrũ yĩxema tama aixcūma Tupanapexewa mexẽ, rũ taxucũrũwa ñacũ rũ nacũma i nagu tixũxũmaã tũgũ tamexẽẽ. Rũ woo tũmaãẽwa nagu tarũxinũxũwa rũ tachixe erũ ngẽma nacũma i nagu tixũxũmaã Tupanapexewa tũgũ tamexẽẽchaũ. ¹⁶Rũ ngẽma duũxũgũ i ngẽmagu rũxinũẽxũ rũ nũgũ yaxugũgũgu rũ Tupanaxũ nacuax, natĩrũ ngẽma nũmagũ naxũgũxũwa nũxũ tacuax na tama aixcūma yĩxũ na Tupanaxũ nacuaxgũxũ. Rũ nũmagũ rũ Tupanapexewa nichixe, rũ tama naga naxĩnũẽ, rũ taxuwama nime na ñacũ rũ mexũ naxũgũxũ.

Nguxẽẽtae i aixcūma mexĩ

2 ¹Natĩrũ i cuma, Pa Titux, rũ cunaxwaxe i guxũgutáma ngẽma mexũ i nguxẽẽtaemaã cunangũxẽẽ rũ taguma nũxna quixũgachi. ²iRũ meā yaxucuxẽgũ i ngẽma yatũgũ i yaguãxgũ na aixcūma meā naãẽxũ nacuããcũma

namaxēxūcax, rü taguma
 nadauxcüraxūwaxegüxūcax, rü
 guxūguma meā nāgu na naxīnūēxūcax!
 iRü nangüexēē na aixcūma meā
 Tupanaāxū yaxōgüāxūcax, rü guxū i
 duūxūgüxū nangechaūgüxūcax, rü
 yaxna namaā naxīnūēxūcax ega woo
 tacü rü guxchaxū nüxū üpetügux! ³Rü
 ngēxgumarüü ta chanaxwaxe i meā
 cuyaxucuxēgü i ngēma ngexūgü i
 yaguāxgü na meā Tupanapexewa
 namaxēxūcax. Rü tama name na
 yaxoregütāaxgüxū, rü
 nangāxēwaxegüxū. Rü name nixī i guxū
 i duūxūgüpexewa rü meā namaxē. ⁴⁻⁵Rü
 ngēma ngexūgü i yaguāxgü rü name
 nixī i meā na nangüexēēāxū i ngēma
 ngexūgü i paxūgü na aixcūma natexū rü
 naxācügüxū nangechaūgüxūcax, rü meā
 naāēxū nacuaqxgüxūcax, rü
 mexūguxicatama na naxīnūēxūcax, rü
 meā napatana nadaugüxūcax, rü guxū i
 duūxūgūmaā namecūmagüxūcax, rü
 aixcūma natega naxīnūēxūcax na
 taxúema chixri Tupanaārü orechigagu
 idexagüxūcax. ⁶iRü ngēxgumarüü ta
 meāma yaxucuxēgü i ngēma
 ngextüxücügü na aixcūma meā naāēxū
 nacuaācūma namaxēxūcax rü tama
 nadauxcüraxūwaxegüxūcax! ⁷iRü
 cumatama rü name nixī i meā
 napexewa cumaxū i guxūwama na
 ngēmaācū wüxi i norü cuaxruū i mexū
 quixūcax! Rü ngēxguma
 cunangüexēēgu, rü cunaxwaxe i mexūgu
 curūxīnūācūma cunangüexēē rü tama
 īnūcaācūma namaā nüxū quixu i ngēma
 ore. ⁸Rü ngēxguma ngēmaācū meā
 cunangüexēēgu i ngēma ore i mexū, rü
 taxúetáma texé chixri nachiga tidexa.

Rü ngēmaācū ya yíxema chixri tachiga
 idexagüchaūxē rü tá taxāneē erü
 taxucürüwa tacü rü chixexūxū tixugü i
 tachiga. ⁹iRü meāma yaxucuxēgü i
 ngēma duūxūgü i coriāxgüxū! iRü
 namaā nüxū ixu na guxūguma meā norü
 coriga naxīnūēxūcax, rü norü corimaā
 namecūmagüxūcax, rü taguma norü
 corixū nachoxūgagüxūcax! ¹⁰Rü tama
 name i norü coriaxū nangīxgü, natürü
 nanaxwaxe i aixcūma meāma norü
 corimaā namaxē rü taguma
 nanawomüxēēgü. Rü ngēxguma
 ngēmaācū namaxēgu, rü guxūma i togü
 i duūxūgü tá nüxū nadaugü na īnūxācū
 aixcūma namexēchixū i ngēma ore i
 duūxūgüxū namaā ingüexēēxū nachiga
 ya Tupana ya tórü maxēxēeruū.
¹¹Tupana rü poraācūxūchima tamaā
 namecūma, rü yemacax núma nanamu
 ga Nane na guxūma i duūxūgüāxū
 nangēxmaxūcax i maxū i taguma gúxū
 ega nüxū yaxōgüāgu. ¹²Rü ngēma na
 Tupana tamaā mecūmaxūwa nüxū
 tacuax na namexū na nüxū rūxoexū i
 ñoma i naānecūāxārü ngüchaūgü rü
 guxūma i to i chixexūgü i napexewa
 ixūxū. Rü ngēma Tupana taxcax üxū
 tüxū nanguxēē na meā yigūmaā
 icuaxgüācūma togü i duūxūgüpexewa rü
 Tupanapexewa meā imaxēxū i ñoma i
 naānewa. ¹³Rü tüxū nanguxēē ta na
 guxūguma meā ínanguxēēgüxūcax na
 nataeguxū ya Ngechuchu ya Cristu ya
 tórü maxēxēeruū ya tórü Tupana ya
 tacü ixīcū. Erü Tanatü ya Tupana rü
 tamaā inaxuneta na wena tá nataeguxū
 ya Ngechuchu, rü wüxi i taāē tá nixī i
 ngēxguma ínanguxgu. ¹⁴Rü nüma ga
 Ngechuchu rü taxcax nayu na tüxū

ínanguxũxẽẽxũcax nawa i guxũma i chixexũ, rü tüxũ yamexẽẽgũxũcax na aixcũma norü duũxũgü i mexũ ixĩgũxũcax rü aixcũma naxcax idaugũxũcax na guxũguma mexũ ixĩgũxũcax. ¹⁵Rü ngẽma ore tá nixĩ i duũxũgũxũ namaã cungũxẽẽxũ rü nüxũ cunangũchaũxẽẽxũ na Tupanacax namaxẽxũcax. Rü ngẽma oremaã tá aixcũma cuyaxucuxẽgü i duũxũgü erü Tupanatama nixĩ ya cuxũ mucü na ngẽmaãcũ cunaxũxũ. Rü tama name na texé cuxũ oxũ.

**Ñuxãcũ nanaxwaxe na
namaxẽxũ i ngẽma yaxõgũxũ**

3 ¹Rü ngẽma yaxõgũxũ i duũxũgü rü name nixĩ i nüxna nüxũ cucuaxãchixẽẽ na meã naga naxĩnũẽxũcax i nachiũãneãrũ ãẽxgacügü rü guxũma i togü i ãẽxgacügü. iRü yaxucuxẽgü na ínmemaregũxũcax na naxũgũãxũcax i guxũma i mexũ i puracügü! ²Rü tama name i texéchiga chixri nidexagü rü texémaã nanuẽ. Natürü name nixĩ i guxũ i duũxũgũmaã namecũmagü rü aixcũma guxũ i duũxũgũxũ nangechaũgü rü tama nügü ínarütägü. ³Rü name nixĩ i yaxna namaã taxĩnũẽ i ngẽma tama yaxõgũxũ, yerü yixema rü ta ga ũpa rü chixri tamaxẽ, rü tama Tupanaga taxĩnũẽ. Rü itayarũtauxe rü tórü ngũchaũ tüxũ napora. Rü chixexũgu rüxĩnũẽacũma tamaxẽ rü taxãũxãchiwaxegü. Rü togü i duũxũgü taxchi naxaie, rü yixema rü ta rü yigũchi taxaie ga wũxichigü. ⁴Natürü ga Tupana ya tórü maxẽẽruũ rü tüxũ nüxũ nadauxẽẽ ga ñuxãcũ tamaã na namecũmaxũ rü ñuxãcũ guxũ i

duũxũgũxũ nangechaũxũ. ⁵Rü yexguma nixĩ ga tüxũ namaxẽẽẽxũ. Rü tama tacü rü mexũ na ixĩgũxũgagu nixĩ ga tüxũ namaxẽẽẽxũ, natürü tüxũ namaxẽẽẽ yerü nüxũ tangechaũtũmũũgü. Rü Naãẽ i Üünexũ i tüxũ ngexwacaxũxẽẽxũãrũ poramaã Tupana tüxũ inayanaxoxẽẽ ga tórü pecadu na ngexwacaxũxũ i duũxũgü ixĩgũxũcax. ⁶Rü Ngechuchu ya Cristu ya tórü Maxẽẽẽruũgagu nixĩ ga Tupana ga guxũma ga norü ngũchaũmaã tüxna namuãxũ ga Naãẽ i Üünexũ. ⁷Rü yemaãcũ tamaã namecũma rü tüxũ narũngũxẽẽ ga Tupana na aixcũma imexũcax i napexewa, rü na nayauxgũxũcax i ngẽma maxũ i taguma gũxũ i írũnguxẽẽgũxũ. ⁸Rü guxũma i ngẽma marü cumaã nüxũ chixuxũ rü aixcũma nixĩ. Rü ngẽmacax chanaxwaxe i guxũguma nüxũ quixu i ngẽma ore na aixcũma mexũ naxũgũxũcax i ngẽma duũxũgü i Tupanaãxũ yaxõgũxũ. Erü ngẽma ore rü guxũwama name i guxãcax. ⁹iNatürü nüxna ixũgachi i ngẽma dexagü i taxuwama mexũ i duũxũgü nawa nügü choxũgagũxũ rü ngẽma oregü i nuxcũmaũgũxũ i duũxũgũchigamare ixĩgũxũ! iRü nüxna ixũgachi i ngẽma nügü ngaexũ! iRü tama name na natanũgu cuxãxũ i ngẽma duũxũgü i nügũmaã nüxũ rünuẽtanücüxũ nachiga i ngẽma mugü ga Moĩché ũmatũxũ! Erü guxũma i ngẽma na nüxũ rünuẽtanücüxũ rü taxuwama name, rü natũcaxmamare nixĩ. ¹⁰Rü ngẽxguma chi wũxie i petanũwa rü chixexũ i nguxẽẽtaemaã ngẽma yaxõgũxũxũ titoyegu, rü name nixĩ i tũmamaã nüxũ quixu na tama

ngexũ tawagũxũcax. Rü ngëxguma tanaxũamagu, rü name nixĩ na wena tũmamaã nüxũ quixuxũ. Rü ngëxguma tama cuga taxĩnüchaũgu rü tanaxũamagu i ngëma chixexũ rü name nixĩ i noxtacũma tũxũ ícumuxũchi natanũwa i ngëma yaxögũxũ. ¹¹Erü ngëma chixri na tamaxũxũwa rü tá nüxũ cucuax na tachixeãëxũ ya yíxema duũxë rü tũmaãrũ pecadugagu tá nixĩ na tapoxcuxũ.

Tituxũ naxucyxë ga Pauru

¹²Rü ngëxguma cuxũtawa chanamuxgu i Artema rü ẽxna Tíquicu, rü chanaxwaxe i paxa Nicaporíchiuwa cuxũ na choxũ ícuyadauxũcax. Erü ngëma tá nixĩ i chanangupetũxëëxũ ya yima tauemacügü ya nagu nagáuanecü. ¹³Rü guxũma i cuxũ taxuchaxũmaã chanaxwaxe i nüxũ curüngũxëë i ãëxgacü i Chena i Dumacũãxgüarü mugũxũ cuáxũ rü Aporu na paxa núma

naxĩxũcax. Rü chanaxwaxe i nüxna cunaxã i ngëma nanaxwaxexũ i norü namawaũ na taxuũma nüxũ taxuxũcax. ¹⁴Rü ngëma taeneëgü i yaxögũxũ, rü name nixĩ i nüxũ nacuaxgü na mexũ naxügũxũ rü togũxũ nangũxëëgũxũ ega tacü nüxũ tauxgux. Rü ngëmaãcü i ngëma taeneëgü i yaxögũxũ rü aixcũma guxũwama tá name i norü maxũ.

Pauru rü wenaxãrũ Tituxũ narümoxë rü naxcax ínaca na Tupana nüxũ rüngũxëëxũcax

¹⁵Rü guxũma i taeneëgü i nuã chauxũtawa ngëxmagũxũ rü cuxũ narümoxëgü. Rü ngëxgumarüũ ta i choma rü chanaxwaxe i nüxũ curümoxë i taeneëgü i yaxögũxũ i cuxũtawa ngëxmagũxũ. Rü chanaxwaxe i Tupana pexũ narüngũxëë i guxãma i pemax.

*Rü nuãma cuxna,
Pauru*